

21/09/1999

Perusuh cerminkan diri sendiri

Ahai Umno

KITA dikejutkan lagi dengan telatah keganasan membabitkan kumpulan pro reformasi yang mengakibatkan tercederanya pegawai polis yang bertugas memukul serta diamanahkan memastikan ketenteraman berterusan.

Kepada anggota polis yang cedera, saya hanya mampu mengucapkan simpati kepada anda serta keluarga dan berharap ianya tidak akan melemahkan semangat juang anda. Persoalannya apakah terlintas di benak mereka yang terbabit memukul anggota polis ini termasuk Ketua Pemuda Keadilan, Mohd Ezam Mohd Nor yang kononnya bertanggungjawab di atas kejadian itu. Pernahkah terfikir oleh Mohd Ezam serta konco-konconya apakah perasaan isteri, anak-anak serta keluarga anda sekiranya perkara yang sama terjadi ke atas anda? Di manakah pula keadilan untuk isteri, anak-anak serta keluarga anggota polis ini?

Apa yang berlaku kini seolah-olah kerajaan Barisan Nasional adalah kerajaan zalim dan sebagainya sehingga Datuk Seri Dr Mahathir disamakan sebagai Firaun. Kepada mereka-mereka ini, saya mencadangkan agar cerminlah diri serta lihat atau dengarlah keadaan dari sesetengah negara jiran yang kucar-kacir. Syukurlah ke atas nikmat kurniaan Allah SWT serta kembalilah ke pangkal jalan.

Sebagai salah seorang yang bertugas di salah sebuah hotel di ibu kota, saya kerap berbicara dengan orang-orang asing samaada pelancong atau pedagang. Boleh dikatakan mereka sememangnya kagum akan bumi bertuah ini dan masih tidak memahami kenapa perlunya ada rusuhan di jalanan dan sebagainya.

Walaupun tidak pernah menjejakkan kaki ke seberang laut, dari cerita rakan-rakan yang melanjutkan pelajaran serta pelancong, saya sesungguhnya berasa amat bangga dan bertuah dilahirkan sebagai anak Malaysia. Saya juga ingin menasihatkan kepada penyokong Pas agar tidak gagal dalam hidup di kemudian hari. Untuk Parti Keadilan, janganlah cuba atau terlintas untuk menjadi pengkhianat agama, bangsa serta tanah air hanya kerana taksubkan mereka serta keluarga mereka. Tidak lupa kepada kakitangan serta pesara kerajaan yang terbabit di mana setiap akhir bulan menerima gaji atau pencen untuk menyara keluarga. Berusahalah menjadi seorang yang sentiasa bersyukur kepada Allah.

Cubalah anda bayangkan seorang anak yang diberi makan, pakaian dan sebagainya menentang serta melemparkan kata-kata yang tidak sepatutnya terhadap anda. Fikirkanlah.